

# DNPKK APROSIMA KAZU DISPUTA PLANTASAUN

Dili-Ekipa téknika mediasaun hosi Diresaun Nasional Prevensaun Konfliktu Komunitária, Ministériu Interior (DNPKK-MI) iha tersa feira ne'e (19/03/19), hala'o aprosimasaun dahuluk ba kazu disputa plantasaun has ne'ebé sai baliza ba familia uma kain rua iha aldeia Klakfuik, suku Bekora, Postu Administrativu Cristo Rei. Kazu disputa ne'e akontese dezde tinan 2012, ne'ebé hamosu desentendimentu parte rua hosi familia Sra. Lucia da Costa ne'ebé hakarak tesi has no familia Sra. Joana Jeronimo ho Sr. Moises de



Araújo nu'udar nain ba plantasaun has lakoi atu tesi has refere. Representante ekipa téknika mediasaun DNPKK, Sra. Joaquina Soares hateten, motivu hosi aprosimasaun ne'e nu'udar asaun no esforsu ida atu solusiona desentendimentu entre familia uma kain rua nian, atu bele moris hakamtek no garante estabilidade iha familia no comunidade nia leet. Nune'e iha prosesu aprosimasaun ne'e Sra. Lucia da Costa argumenta nia parte mantein no hakarak tesi plantasaun has ne'e atu labele fó impaktu ba uma no ameasa ema nia vida. "Ha'u hakarak tesi tiha sanak ne'ebé taka tomak ami-nia uma leten, has tahan maran no dodok halo kalen ku'ak no furujen, depois has ninia hun no abut komesa estraga uma fatin, nune'e iha tempu udan no anin mosu dezastre ne'ebé ameasa ba ema-nia vida, depois akontese dezastre iha fatin ne'e sé mak atu responsabiliza", fundamenta Sra. Lucia. Iha fatin hanesan Sra. Joana Jeronimo antes ne'e lakoi atu tesi plantasaun has ne'e depois aprosimasaun nia parte rasik deklara hakarak tesi has refere, maibé tenke ko'alia ho di'ak. "Ba ami atu tesi has ne'e laiha problema, ami mós hakarak tesi dunik has, maibé ita tenke ko'alia di'ak ba malu, la presiza atu ko'alia ho noverzu no hakilár de'it, atu tesi bainhira de'it ami prontu no tesi has ne'e di'ak liután", deklara Sra. Joana.

Entretantu, bazeia ba rezultadu aprosimasaun ne'e, parte rua ne'ebé disputa konkorda atu tesi plantasaun has hakarak dame malu hodi hakotu desentendimentu entre familia rua nian liuhusi mediasaun ne'ebé sei organiza hosi parte DNPKK, ho autoridade lokál suku Bekora no Ofisiál Polisia Suku (OPS) iha tempu badak. Envolve iha prosesu aprosimasaun ne'e, kompostu hosi Sra. Joaquina Soares, Sra. Evalina da C. Guterres, Sra. Simoa Andre dos Santos, no akompaña hosi estajária UNTL.\*CM\*